

四年一度的奧運將於下月底在巴黎舉行，黃翠如有幸到當地採訪見證盛事。有天氣預測歐美正受熱浪侵襲，巴黎或成史上「最熱奧運會」，翠如表示不擔心，會帶防曬用品及盡量少郁動「抗熱」。記者提議她帶小背心或比堅尼到當地，其老公蕭正楠聞言即大反應說：「唔好呀！」

天氣預測巴黎奧運熱浪逼人

聞翠如帶比堅尼 蕭正楠嗌唔好



張曦雯指男友很想結婚。



陳煒由佛山趕返港拍節目。

譚俊彥、蕭正楠、陳煒、龔嘉欣及張曦雯 (Kelly) 等，昨日到電視城為方力申與黃翠如主持的煮食節目《拍檔廚房》延續篇《拍檔食堂》錄影。翠如透露下月將到巴黎採訪奧運，主要負責採訪周邊事物：「聽聞當地好多餐廳同店舖，因擔心應付唔到太多顧客，研究緊會唔會門門唔做生意，我都擔心拍唔到主題餐廳同奧運氣氛。」聽到老婆翠如可能無啖好食，阿蕭笑言：「我煮定啲嘢畀你帶過去，食壞肚好過冇得食。」

提到天氣預測巴黎即將迎來一股超級熱浪，問翠如會否帶小背心或比堅尼？她笑言：「都唔係我着啦！」阿蕭亦說：「唔好呀！」翠如稱以前去過南美洲拍旅遊節目：「當時都講緊30幾40度，都有概念，到時唯有唔好郁動太多，同理帶防曬用品。」問阿蕭會否去巴黎探班？他說：「都想去探班，但7月我要喺佛山拍《巨塔之后》，9月又要去布拉格。」問到會否擔心太太？他坦言羨慕多過擔心：「4年一次，聽聞啲入場券炒到好貴。」然後向翠如說：「我淨係想要C朗簽名球衣，對你有信心，有

機會嘅。」翠如則指以前採訪世界盃時，都有幫老公搵明星球衣：「發覺真係好貴！」

陳煒與宣萱相逢恨晚

近日忙於在佛山拍《巨塔之后》的煒哥，特別回港錄影節目，提到《巨》劇開拍前臨時易角，由張可頤變成宣萱，煒哥表示未能跟張可頤合作感可惜，但能跟宣萱演戲都好開心：「我哋好多嘢傾，關於健康、寵物同護膚心得，有相逢恨晚嘅感覺。」

早前Kelly與男友在中環拖手行街被偷拍，事後在網上瘋傳，Kelly大方說：「其實嗰日係生日，當時就係行緊去食飯，男友都見到有人影相，當係生日留個紀念，我哋從來冇避忌。」問到可有結婚計劃？她坦言：「男友想啲，我有乜諗呢樣嘢。（有啲BB先結婚？）我連結婚都唔想，點會想生BB？遲啲先算，不過有都係一種祝福。」




翠如自爆曾為蕭正楠買球星簽名波衫。

霆鋒花一年時間爆肌

由謝霆鋒、張學友、劉雅瑟等主演的《海關戰線》，榮幸獲邀參展第23屆紐約亞洲電影節，霆鋒同時奪本屆電影節最高榮譽——亞洲之星大獎，為隆重其事，霆鋒將於7月中飛往紐約領獎。

首次身兼男主角及動作指導的霆鋒透露，花了一年時間「武裝」自己：「始終主題是有關紀律部隊，一定要以最佳狀態上陣！」最終他操得一身橫練肌肉，問到有什麼秘訣？他笑言：「最重要吃得清淡，因為電影有很多動作場面，一定要有足夠運動量！」正式開機前，霆鋒拍下一輯陽剛味十足的寫真，經過地獄式特訓，再加上嚴控飲食，其體能已達巔峰水平。由此可見，霆鋒非常重視《海》片，專業態度可嘉！



霆鋒赤裸上身晒結實肌肉。

陳山聰袁偉豪正邪對決

警匪劇《反黑英雄》將於無綫翡翠台首播，隨着電影《九龍城寨之圍城》再度掀起港式武打片熱潮，《反》劇亦帶有同樣概念，不少動作場面除選擇在充滿港味的橫街窄巷及鬧市拍攝，追逐、槍戰、對打及爆破等場面設計亦是挑戰電視尺度，包括警匪正面交鋒、埋身肉搏、槍林彈雨等情節！

飾演大奸角的袁偉豪 (Ben) 於其中一幕被十多人追斬，仍能僅以一把開山刀以寡敵眾，盡顯其狠勁！至於飾演反黑組探員的陳山聰，與Ben誓不兩立！Ben開車高速行駛，山聰為了追捕對方，整個人凌空掛在車上，最後更被掏甩慘變「滾地葫蘆」！



陳山聰(右)與袁偉豪於劇中正邪不兩立。

偶像。倫永亮年輕時已視葉麗儀為



倫永亮自爆「跟蹤」葉麗儀

倫永亮前晚出席港樂50周年晚宴，他表示8月會為葉麗儀的演唱會擔任音樂總監：「我讀中三時已經好欣賞葉麗儀，自從睇咗佢啲《聲寶之夜》演出後，我決定追星！因為當年錄音室係我屋企附近，又知佢錄音嗰陣會去附近士多買嘢食，我就去士多等佢，但唔敢行埋去，只係靜靜地望佢。入行後同佢講番，佢話佢當年着短裙，佢聽完就係咁笑。」倫永亮又透露另一好友林憶蓮的近況，指憶蓮現於英國度假，並指對方在網上發布單曲，希望將來再與憶蓮合作。